



UNIVERSITÄTS-
BIBLIOTHEK
PADERBORN

Les Fleurs Des Vies Des Saints Et Des Festes De Toute L'Annee, Suivant L'Usage Du Calendrier Romain Reforme

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXII La vie de saint George martyr.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

LA VIE DE SAINT GEORGE,
Martyr.

23.
AVR.



ENTRE les moyens & artifices dôt les heretiques se sont seruis pour obscurcir la splendeur des Saints, & la gloire de l'Eglise Catholique, ç'a esté d'escrire quelques vies des glorieux Martyrs de nostre Seigneur, y entremeslâ tant de fables & de choses prodigieuses que ceux qui les lisoient les tinssent incroyables, & iugeassent que ces Saints desquels ils lisoient les vies, n'auoient esté Saints, ny ne meritoient d'estre tenus pour tels. En tesmoignage dequoy le sixiesme Synode cōmande qu'on brûle ces liures-là, & defend de les lire, ny mettre en lumiere. Cela ce void aussi au Decret du Pape saint Gelase, touchant les liures apocriphes, lesquels il dit qu'on ne doit point lire en l'Eglise Romaine à cause que les heretiques les ont cōposez, & particulièrement il met le martyre de saint George, duquel nous descriuôs icy la vie: De sorte que nous apprenons par Decret de saint Gelase, que les heretiques escriuent la vie & martyre de saint George, & que telle vie est defenduë, encore que nous ne sçauons où est ceste vie là, ny qui l'escriuit. C'est pourquoy au Breuiare Romain, reformé par Pie Quint n'y a point de leçons particulieres de saint George, on ne fait aucune mention de sa vie, ny de son martyre, parce qu'on n'est pas certain de ce qu'on en trouue par escrit: & l'Eglise Romaine fuit comme la peste, tout ce qui peut sentir de mille lieuës loing la doctrine, ou les ruses des heretiques. Louys Lypoman Euesque de Veronne, a mis en lumiere deux vies de saint George Martyr, l'une qu'il eut à Venise écrite par Metaphraste, & l'autre de la Bibliothéque de Grotta Ferrata (qui est vn Monastere de Moynes eracs de l'Ordre de saint Basile) distant environ quatre lieuës de Rome, écrite par Pasicrates seruiteur du mesme saint George: lesquelles il fit traduire de Grec en Latin: & les mit en lumiere, & dit que ce n'est pas ces vies là que le Pape Gelase censure, au contraire qu'elles sont approuuées par le tesmoignage de l'Eglise Orientale: en laquelle on a coustume tous les ans de les tenir pour vrayes. Surius les met aussi en sō second Tome des vies des Saints; mais le Cardinal Baronius examinant ces vies de point en point avec sa curiosité ordinaire ne les repete pas si nettes & sinceres, qu'il n'y ait des choses inferées parmy, adionstées & enracinées, qui ne sont pas veritables. Cela m'auoit induit à laisser du tout le discours de la vie de saint George, pour me conformer en cela au Breuiare Romain, & ne dire rien des Saints qui ne soit bien aueré; toutesfois j'ay pensé depuis que ie pouuois suiure la censure & autorité de ces deux grands personnages, Lipoman & Surius, qui ont si bien merité de l'Eglise Catholique. De façon que j'emprunteray des vies de saint George qu'ils rapporterent ce que j'ay trouuë de plus certain, & qui sera d'edificatiō,

laissant ce que le Cardinal Baronius, ny moy plus, ne iuge pas auoir assez de probabilité, ny estre suffisamment fondé en la verité.

Saint George estoit de Capadoce, nay de parens Nobles & riches, il fut instruit dès son enfance en la Religion Chrestienne. Estant paruen en aage, il suiuit la guerre, à laquelle il estoit fort adroit, tant à cause de ses forces, que sa disposition corporelle, qui luy acquirent incontinent la charge de Tribun, ou Maistre de camp de l'armée de l'Empereur Diocletian, lequel honora beaucoup saint George pour les belles parties qu'il auoit, ne pensant pas qu'il fust Chrestien, & faisoit estat de s'en seruir en ses plus grandes & hazardeuses entreprises. Il aduint que l'Empereur voulant persecuter l'Eglise Catholique, & defraciner (s'il eust peu) du monde la Foy de nostre Redempteur Iesus-Christ pour y faire florir le seruice des faux dieux, desquels il estoit tant abusé, qu'il pensoit que la felicité & la grandeur de son Empire dependoit d'eux, il proposa son Conseil, & à ses Officiers l'intention qu'il auoit de persecuter, & faire cruellement mourir tous les Chrestiens qu'il pourroit attraper, implorant sur ce leur conseil & assistance. Comme la flatterie est la plus puissante, & tient le haut bout dans les Palais des Princes, chacun loüa & approuua la resolution de l'Empereur. Il n'y eut que saint George qui estoit present à ce Cōseil, lequel impugna comme vne chose iniuste, & contraire au seruice du vray Dieu duquel il auoit l'amour de la religion empreinte dans son cœur si auant, qu'il estoit prest de perdre la vie plustost que de s'en partir. L'Empereur, & toute l'assistance, recogneut bien aux paroles de saint George qu'il estoit Chrestien, & tascherent à le destourner de sa resolution, luy remettant deuant les yeux la fleur de sa iuuesse, sa brauerie sa noblesse, & ses richesses, les faueurs & grands biens faicts qu'il auoient receus de l'Empereur, & ce qu'il en pouuoit esperer à l'aduenir: d'autre part, la perte de ce grand dommage qu'il receuroit, refusant de sacrifier aux Dieux, & d'obeir au commandement de Diocletian. Le braue champion de Iesus-Christ ne s'esmeut aucunement de tout cela, au contraire il se tourna vers l'Empereur, & luy dit: Il vaudroit mieux, ô Diocletian, que vous cogneussiez, & adorassiez le vray Dieu, & luy offrissez vn sacrifice de loüange, car en ce faisant, il vous donneroit vn plus excellent Empire que celly duquel vous iouïssiez à present, qui est fragile & caduque, & finit en vn instant, & tout ce qui y est cōpris est perissable de sa nature, & s'euanoüit entre les mains, & ne peut seruir à celly qui le possede. Pour mon particulier, qui ay ceste lumiere & cognoissance, ne vous mettez pas en peine, ô Empereur, de me persuader que ie renonce le vray Dieu: car ny vos promesses ne me sçauoient fleschir, ny vos menaces espouuenter. Il ne se peut dire de quelle rage & furie l'Empereur le fit aussi prendre & mettre en prison, où il fut chargé de chaines, & estendu tout plat sur le paüé, avec vne grosse pierre qu'on roula de sus son corps. Le lendemain on l'amena de

uant l'Empereur, où apres plusieurs demandes & réponses, il le fit tourmenter dans vne rouë, qui estoit armée tout autour de pointes traichantes comme rasoirs qui deschiqueroient la chair du S. auquel tourmēt il fut consolé d'vne voix du Ciel qui luy dict: george, ne crains point, car ie suis avec toy: & d'un homme resplandissant vestu d'une robe blanche qui luy apparut, & luy tedit la main, l'embranchant & encourageant en ses travaux. Aucuns furent conuertis à la Foy de nostre Redempteur Iesus-Christ, par la constance de saint george, entr'autres deux Preteurs gens de grande autorité, qui se nommoient anatole & protole, lesquels furent decapitez pour l'amour de Iesus-Christ. D'aurant plus qu'on redoubloit les tourmens du saint, la patience & constance en son martyre s'augmentoit dauantage, au grād contentement des Chrestiens, & à la confusion honteuse des payens, dont l'Empereur creuoit de despit, ne sachant plus que faire pour vaincre ce Martyr, qui se rendoit inuincible aux plus espouuantables tourmens. En fin il eut recours aux belles paroles, & l'exhorta de ne se redre si obstiné à perdre sa grace: au surplus, il vouloit obeyr comme à son pere. Le saint desirant de manifester encore dauantage la vertu de Dieu, luy dict: S'il vous plaist, ô empereur, allons au Temple, & nous verrons les Dieux que vous adorez. L'empereur fort ioyeux, croyant que George s'estoit recogneu & changé, fit assembler le Senat & le peuple pour se trouuer au Temple, & estre presens au sacrifice que George deuoit offrir. Comme ils furent tous venus au Temple, regardans ce que feroit le saint, il s'approcha de l'Idole d'Apollon qui estoit là, auquel il demanda, estendant la main: Veux-tu que ie te face sacrifice comme à Dieu? & fit le signe de la Croix: alors le diable qui estoit dans la statue, respondit: Ie ne suis pas Dieu, & n'y a point d'autre Dieu que celuy que tu presches. Le saint luy repliqua: Comment oses-tu donc demeurer icy en ma presence, puis que ie cognois & adore le vray Dieu? A ce propos on entendit des cris & gemissements lamentables qui sonnoient comme de la bouche des Idoles, qui tomberent toutes par pieces & morceaux. Les Prestres voyans cela, inciterent le peuple à mettre la main sur le saint, disans à l'Empereur qu'il falloit descher ce Magicien, auant qu'il les fist mourir de regret de l'affront qu'il faisoit à leurs Dieux. L'Empereur à la suscitation des Prestres, poullé de sa fiere impieté, & d'un grand nombre de Gentils, qui s'estoient conuertis à la Foy de Iesus-Christ, ayant veu leurs Idoles portez par terre, par la vertu & prieres de saint George, luy fit trancher la teste pour empescher que le mal ne passast plus auant. Le saint fut mené au lieu du supplice, & il pria les bourreaux de luy donner vn peu de loisir de faire son oraison: ce que luy ayant esté accordé, il leua les yeux & les mains au Ciel, & d'une voix souspirante qui sortoit du cœur, pria en ceste sorte: *Seigneur mon Dieu, qui estes auant tous les siecles, vous m'avez esleu pour vous dès mon enfance, vous estes l'unique & vraye esperance des Chrestiens, le refuge assure*

de vos seruiteurs, letres-riche & inepuisable tresor de tous ceux qui ont fiance en vous; qui gratifiez ceux qui vous aiment, mesme auparauant qu'ils ouurent la bouche pour vous demander quelque chose. Escoutez-moy, Seigneur, puis qu'il a plu à vostre misericorde me donner la patience, la force d'endurer les tourmens, & confesser vostre nom: receuez maintenant mon ame, & la mettez parmi vos esleuz en la gloire eternelle. Pardonnez à ces gens ce qu'ils ont fait contre moy, & à l'endroit de vos autres seruiteurs: donnez-leur la lumiere par laquelle ils se puissent recognoistre, & puis que vous desirez que tous soient sauuez, donnez la main à tous ceux qui vous innoquent, & implorent vostre faueur, avec vne sainte crainte, & vne charité enflammée, afin qu'en vous aimant par dessus toutes les choses, ils imitent & suivent la trace des Saints, pour iouyr conioinctement avec eux, de vous, à qui est le Royaume, la gloire, & toute la felicité. Son oraison estant acheuée, il semit à genoux, & tendit le col au bourreau, & mourut en nostre Seigneur le vingt-troiesime d'Auril, sous l'empire de Diocletian. Il fut martyrisé en Perse en la ville de Diopolis, encore que d'aucuns disent que ce fut en armenie, en la ville de Mitilene. Le martyr de saint George fut fort celebre, & recommandé par toutes les eglises d'Orient & d'Occident. Les Grecs par excellence l'appellent, le grand martyr de saint George. Saint Germain Euesque de Paris retournant du pelerinage qu'il fit en Hierusalem, apporta le bras de saint George que l'Empereur Iustinien luy donna, comme vn tres-precieux ioyau: il le mit à Paris en l'Eglise de saint Vincent, à present nommée saint Germain des Prez. On garde à rome le chef de saint George, en vne Eglise qui porte son nom, qui y fut mis par le Pape Zacharie, comme il est escrit au liure des Papes de Rome. Saint George Pape fit racommoder vne Eglise du mesme saint Martyr, comme il est escrit au 68. du liure 4. Indiction 4. l'autre bras du mesme Martyr fut porté à Cologne, & Dieu fit par luy de grands miracles, comme l'on void es Actes de saint Amen euesque de Cologne, & Gregoire Euesque de Tours, escrit de ses reliques es miracles de la gloire des Martyrs, chapitre 101. L'Empereur Iustinian fit bastir vne eglise magnifique souz le nom de saint George. Les Rois en leurs batailles le tiennent pour leur aduocat particulier, & l'Eglise Romaine a de coustume d'inoquer saint George, saint Sebastien, & saint Maurice, comme les specieux protecteurs à l'encontre des ennemis de la foy.

LA VIE DE SAINT ALBERT,
Euesque de Prague, & Martyr.



E glorieux Euesque de Prague saint Albert nasquit en Boesme, de parens illustres: son pere estoit issu du sang Royal, parent du Roy Henry: sa mere estoit d'une grande famille, Esclauone de nation. Ces Seigneurs estoient riches & puissans: